



Sabtu, 27 Januari 2024
Ogen: Matius 7:12



Bahanlah Si Mehuli



Sada pengajaren si cukup sederhana ituriken Tuhan Yesus man simegiken pengajarenNa i datas uruk e me erbahan si mehuli man ise pe. Nina, 'bahanlah man kalak si deban bagi ngena atendu ibahan kalak man bandu.' Enda kesimpulen kerina undang unang si isuratken Musa ras kerina nabi-nabi.

Adi sungkun isi pushuta si mbagesna kal, tentu si mehuli nge kerina ateta jadi man banta. Meriah nge ukurta adi kita iperdiateken temannta, meriah ukurta adi lit si man alonken entah ngaloken hadiah. Meriah ukurta adi kalak ramah man banta, meriah ukurta adi isampati teman kita tupung perlu kal kita penampat. Melala kal nge si erbahansa ukurta meriah. Tentu temannta si deban pe bage ka nge sura-surana. Labo perlukal itafsirken pengajaren Yesus e, siiarapkenNa e me lakokenlah!

Si pelebe erbahan si mehuli man temannta, si sampati teman i bas kepiketenna, siperdiateken geluhna ras isi jabuna, siperkuanken ia i bas kelungunenna, si bere hadiah i bas kesuksesenna, siergaken ia i bas pendahinna, si bereken dukungan i bas usahana, ras sidebanna. Adi siperdiateken temannta ras siukuri kai si mehuli man bana kita enggo ngelakoken undang-undang Musa. Ras e me siiajrken Yesus pe man banta.

Ula min kita ermediate terjeng medsos ngenca, si terjeng ioge kenca e ihapus. Ermediate i bas dunia nyata, banci igejapken teman sekelewetta. Ukur Dibata kal e, e me nehken perbahanen si mehuli man teman. Janah kai si ilakoken kita, kai siierdangken kita e ka nge pagi si perani. Labo mulih man banta si sia-sia adi kita ngelakoken si mehuli. Iidah Dibata kerina si isuanken kita mulai kin i bas pusuhta nari. Ras erbage dalam Dibata ngkuhi ras mperdiateken keperlunta sekalak-sekalak. Sipebelinlah biak ermediate ras nampati sekelewet, gelah kekelengen Dibata e ternanami enterem jelma.